

305  
20



始



悔翁詩鈔九

孟嘉大書國士信寄贈本

江甯汪士鐸

甥上元吳達重校刊

癸卯聞南河又決

萬里黃河水憂勞做 至尊昨聞修六塔今又決三門  
持節宗臣重飛芻大令煩東南民力竭早歲苦孫恩

庚戌除日前二日

萬感迫歲暮那堪在遠行臨風一遙憶知君多苦情老  
為妻女累詩兼貧病聲回首視同輩當筵綠酒傾

枯樹多奇蠹空弦無好音遂令貧賤感迸入別離心涉  
世既不媚於今悔獨深寒鴉方擇木為爾一沈吟

歲暮徐州雜憶二十詠

歲暮夕除遠客間住無一錢可寄念及故鄉病妻弱



女告貸無門對影焚焚無可與語南北兩  
地心焉傷之勞者自歌不能爲外人道也

### 望信

鴻雁無時到有懷徒首搔路遙疑病痛累重憶泉刀屢  
誤破關語因之握粟勞徐方民不靖羣盜正如毛

### 市物

一尺故園雪貧家多苦情物憂魚肉貴價喜米鹽平舊  
事勞頻想主人方遠行未知年老嫗可解趁時晴

### 祀竈

骨肉半生死兼之遠客時不知司命醉可識主家悲故  
國憂貧賤他鄉感別離蒼冥如下問莫便怕歸遲

### 桃符

臨行無別事潑墨寫新聯想掛雙扉上當居萬戶先於  
今悲昔夢從古惜華年若問斯冰蹟憑君莫浪傳

### 祀祖

時長女孀居

今日思宗祖堂前太息俱馨香兒女泣拜跪子孫無老  
驥悲懷玉孤鸞歎掌珠泉臺終日餒淚灑紙灰粗

### 設像

骨肉全家聚堂前共酒卮聲音餘笑兒死別勝生離老  
態日衰醜拜瞻能幾時睽違千里外冠服繫悲思

### 爆竹

聞說東鄰客當年爆竹高邇來累兒女無處覓錢刀我  
亦乞廚米猶將質縑袍與君共滅跡閉戶刺生毛

烹飪

貧家無盛饌數簋與人宜  
君昔驅羸馬妾曾烹伏雌  
酸鹹羞世味飲啖憶當時  
何日飄蓬返燈前酒一卮

辟債

千里黃沙外聊爲辟債臺  
反憂逋客藪無復故人來  
翦燭翻文簿何心對酒杯  
五更呼負負不寤步裴回

贖衣

雖無膏沐意聊贖嫁時衣  
禮重繫蘋薦家寒婢媪稀  
安排隨女伴熨貼待君歸  
猶勝牽蘿日天寒賦式微

饋歲

無奈瓊瑤贈年年到窶人  
雞豚故山社酒茗大江春  
此

日及暮歲知君仍饋貧  
可堪籌李報身世尚勞薪

果品

材大誰爲用松杉處世難  
遙知榛栗品宜得女兒歡  
李實或在井檳榔休貯盤  
欲尋赤松子卻隔五雲端

紅錢

十年磨圭角欲附孔方居  
心不嫌銅臭君偏與我疎  
鄉人翦藤紙聊此飾茅廬  
欲寫錢神論長歌仗啟余

翦燭

麗譙將四鼓蘭燼暗簾旌  
爾淚亦不止妾心誰共明  
容誰修火滅喜尚看花成  
遙想官衙酒當筵定絕纓

接窳

言九  
三  
職位有肥瘠豪華每并兼知君最强項故爾莅窮瘡草  
長馬猶瘦風寒泉亦廉大烹宜絕望每日祇齋鹽

守歲

往者惜年少深嗟日月流今予悲遠客惟恐歲華留  
輓之殊孟浪逐更增繁憂官衙偕老友閒話涕難收

元旦

萬禩軒轅紀龍飛第一春朝房趨貴客旅館臥閒人老  
病功名淡遠遊朋友親官衙隨燕賀強自整儒巾

賀年紅箋

不效禰衡傲兼無諸葛名聊憑三寸紙如向萬家行奴  
僕增跋涉主人免送迎繩牀蒙被臥耳聽報春晴

元宵

徐方真惡土不解買春燈遂令狂遊客俱如守戒僧故  
鄉椽作燭幾處酒如澠莫與金吾遇閉門姑煮冰

收像

一年一展拜欲卷淚汎瀾依稀接色笑上比游衣冠疇  
昔容顏改平時奉事難遙知望孫子舉箸強爲歡

雉

爾性殊多介余心竊所傷故儔正媒孽幾輩愛文章誤  
以朝飛曲兼之遠送腸山梁宜伏處鼎俎待君香

雁

炎朔殊風氣長征萬里餘他鄉猶作字故友漫傳書寒

渚木落後素琴人倦初家山歸未得風雪一躊躇

蠶繭

三起復三眠絲抽獨緒圓誰知多束縛本不爲纏綿一繡將雛鳥翻爲別鵠弦故園桑已老冷暖怨吳天

蟋蟀

出世迫秋色感時多苦音戶庭今夜冷刀尺故園心誰是授餐者因之戒鬪深呼燈方覓汝露草莫微吟

四憶

李石耕榷

往偕吳季重薄暮過郊垞微月下蘿逕雜花園草亭故人饋春酒寡女守遺經坐久安禪寂移燈隔素屏先生無子依寡女以居

又高子固丈鶴

屢抱西河痛靈光巍獨存行藏真大隱堂構有文孫相宅諸甥貴登壇老宿尊平生感知已總角侍琴樽先生朱校官襄王茂才謙陳明

經衍吉陳廉訪之驥

又

宗錦城外舅長春

壯志何嘗展巖阿老布衣有誰憐濶達不解惡寒微補屋如姬老吹簫少子歸更貽嬌女淚終日泣牛衣先生擇婿

甚求備而獨不以予貧爲意

又

蘇振聲舅氏耀宗

夕照滿平野先生散學回穿池魚更樂移樹鶴相陪猶子催租去隣僧送畫來朝飢那可療無限渭陽哀先生有猶子

子某類以租詐先生金或  
為不平而先生處之怡然

題姚花農湖隄伴月圖

十載關山路羈愁奈晚何重思明月好不似故鄉多予  
美隔烟水秋陰起薜蘿羨君豪興在湖上足高歌

古堞代

角聲吹不斷暮色上孤城樓圯狐能語榛蕪雉漸平烽  
烟成異代雀鼠賴餘生祇有濠邊月會窺保障情

古渡代

古柳棲鴉外粼粼野水流橋危餘斷板沙淺閣虛舟過  
客猶驅馬村民競飲牛昔年車駕跡惟有夕陽留

古驛代

鳥道盤雲細頽垣蔭女蘿山川前路遠冠蓋昔年多題  
壁蝸涎亂當門虎跡過退耕憐驛卒曾紀旅人歌

古寺代

叢篁遮破刹蛛網絡重重殿圯猶存佛樓傾漫打鐘病  
僧閒種菜廢塔半依松欲覓殘碑讀苔花處處封

山行

米擔妨行客徽甯閒負擔者率別以一木橫肩與肩

輿辟道旁始同於左林深秋欲雨室暗日無光其俗室

須竹規引水分泉細松棚賣餅香方言茫不辨第一是

爺娘呼父為伯與兄

耆老迷車馬徽居萬山鄉風長子孫俗女長於男七八

子若干孫其人才三  
十二其婦老嫗矣  
溪回山確矮麪少竹哇男僕也喧相  
謁宿閒貴行沽水酒溫一花兼一朵薄紙三張冥銀七錠之名羣拜

夏官社公門也

越人長躋眾吳老薄心希風俗忠厚石瀨泥茶竈山潭浣葛

衣芙蓉葛炭稱雞骨賤人拜馬頭歸近知蠶桑主客癯如鶴召

優勿說肥人皆疲削

畢生談相墓千里率行商武略前賢少文壇近日張亂

山延社友深竹隱書堂篝火松牕靜評論喜夜涼

夢

衰年了無夢夢亦只豆羹不作一命望況思百世名才  
拙情味淡氣弱心跡清醒來臆月落簷鐵鳴南榮

宿東陽橋

驅車渡野水落日下高原一徑入深莽萬山圍小村撒  
沙新鬼聚拜月老狐蹲不敢吹燈臥鄰家虎叩門

蒲塘橋

郵亭三十里石壩暗通潮燈火喧津市菰蒲失野橋閉  
門僧梵靜到店馬蹄驕隨意魚蝦美鄉愁酒不消

自雞毛坦至柏樹坑訪程汝鈞

沿溪三四曲竹露每沾衣幽谷白雲散到門黃鳥飛隣  
翁隔籬問童僕采茶歸莫笑芒鞋溼昨宵宿翠微

上馮村老翁甲寅

釣魚師不見微雨溼苔磯流水聲在耳林花香滿衣村



深黃鳥遠日午白雲霏強遣旅愁散從君此息機

五都蒙泉書舍

甲寅

寂寥伯牙弦徒步陟蒼烟客子猱升木生徒魚躍淵單  
椒上涼月孤館枕飛泉兀坐一鐙燼寒蛩勸且眠

綵緣西房有餽餅同游者

甲寅

旅魂召未定抱病得枝棲遠眺秋林合未明幽鳥啼出  
游來田叟交譚有山妻衰老不自食勞君麥飴攜

存耕堂胡邦信學舍

烽燧赤山澤入目皆空城復次元龜耳重聞蒼蠅鳴短  
褐八九子瘦竹夏楚聲意倦此枯坐多君主客情

上九江巴斗船

吳楚川流合蒼天爲置關疏燈彭澤縣殘雪小孤山地  
險餘青壘神閒墮翠鬢憑高望鯨窟伐鼓哨船還  
楚天望不極寒色上孤蓬燧火三吳遠江流九派通市  
樓沽酒白隣舫乞燈紅我友叢祠返筵尊卜順風

有感

楚南多盜賊第一道州難會匪嚴營伍鉗奴入將壇發  
邱開古冢謀食膾人肝好亂眞天性何嘗望達官  
上下相蒙日公文粉飾同奸民謀逆久巧宦養癰工吏  
道稽陳例軍書尚鑿空憂葵惟老女垂涕問蒼穹  
典籍憂秦火衣冠付楚囚渠魁同馱舌幼崽習蛇矛絳  
幘召羣盜黃衣拜列侯懲荆詩枉誦何日滅蚩尤

平原擅文采一旅敗河橋廟兒祠官遁宮牆楚炬焦杏  
梁輸將作藻井付薪樵無復靈光殿長才奈洞簫  
稽古卑三代掄才有四元談天文始貴記姓字方尊參  
佐皆蠻語兒童競楚言明公傳好士狗盜與溫存  
患氣釀淫雨公私始阻遲因之構禍亂觸處蹈危疑機  
發不終日人生每後時聖賢桑土意晴霽孰先知

題舒貞素遺詩

司空唐節士元亮晉遺民雅抱經營志同傷離亂人立  
身師百世妙墨照千春惟有編摩者爲君分苦辛

謂汪守存

左河隄謁者鼻紐銅印

以下皆爲周筱農作

漢室憂東郡河公歲殺人言尋張甲瀆請徙冀州民惟

見拳茭塞虛傳刻玉巡北流諸利害誰爲宋儒陳

瘞鶴銘

西風二百里飛渡潤州城昨夜江潮落故人村酒迎  
燈簷雨細驚觀華陽名畫肚識翠墨平生老眼明

軍司馬印瓦紐

比千石

昔聞假司馬威力震烏孫計就諸番隔功成漢將尊同  
心憑士氣專制卽君恩猶有未投筆銘勳返玉門

王子壽心

相寄百柱堂大集卸報

昔年苦于役避地過螺磯古木迷行屐春潮冷客衣里  
瞻通德近心忽款門違無奈扁舟發蒲帆逐鳥飛  
解后參軍廡清尊接快譚壯懷欽卓犖道氣仰淵涵客

舍來鴻鯉朋箋使靳驂留行逢節帥辛苦爲封面  
喜被元侯召寒江理楫遲里閭慘墟落薪粟受支離今  
雨談新政晨星弔故知瘡痍哀滿目賤子敢言詩  
純孝王三老哀時杜少陵遠將照乘寶寄惠在家僧牛  
鐸音難和龍泉氣上騰羨君觴詠處大雅盡聯鐙

偶題

窮陰不可極寒色下庭柯地僻鄉音少朋來別緒多  
暝烟山有木夜雨水層波共此西窗坐休爲斫地歌  
借問丹邱鳳如何下碧梧龍門無逐客象罔有遺珠行  
未毛三伐飛宜尾畢逋雁書今日返謂受老夫愚

題楊朴庵集

干戈十二載江漢惜分襟白髮尊遺耆朱弦矢雅音  
離人事改貧賤道心深幾日從之往山空石氣沈

與胡恆新話昔游

役車會偃息斜日淡巖間小市門先閉深松鳥自還  
僧歸烟際寺人臥雪中山忽報貪狼過街鄰盡掩關

甲子十二月李邢氏貞孝傳

劫火東南烈胭脂無限腥誰翻貞女論上補聖人經  
才士皆心折衰翁尤涕零兩雛同正命竹帛共芳馨

答興言

賣藥難醫世求官不療饑干人十書上見事七年遲  
我抱古人籍甘爲童子師北風深巷雪猶恐近賢知

頤壽堂爲甘愚亭作

江表來賢尹時當浩劫平引年追舊典好士此先聲衰  
矣周三老迂哉魯二生願持松柏節莫負館餐情

周莠卿漢北築城圖

築城當河水南北扼通津此事高千古沈謀能幾人雲  
霞商雒曙亭館襄樊春今日同文軌安眠忘戰塵

昔每嘲山簡高陽不醉歸龍蛇方在陸戈戟合伸威涼

雍銷金甲庭閣戲彩衣遙知珠履客公讌禮無違圖名

敵臺

方伯雄於正月六日無疾而逝

出處無遺憾林居過十年封疆公論定文字諫書傳近

得閉門樂同參不語禪紛紜時事改一夢已登仙

聞人談會中丞事

元象薇垣肅人龍草澤忠湖湘召義從江皖建殊功壁  
壘凝烟紫余皇喋血紅至今思偉烈歌詠徧江東

登臨

百憂結不解扶杖偶登臨老木秋聲聚高原雨氣深算  
無能盡策文有不傳心日暮暝烟合寒蟬聊一吟

題翁子謙明府以巽學書硯

吾鄉有循吏聲譽滿錢清政事自足紀翰墨匪求名此  
亦鬱林類誌同金石盟著書與草檄好任孝慈耕

無題 甲寅

鳳凰不如我妾不樂鳳凰君言亦復佳渠意殊未央丹  
竈黃金藥羅縠明月璫舜跡果何物苟生盡此觴

尺勘嶺

甲寅

螺旋數千級上下援枯藤飛鳥往而復沐猿降再升巖  
頭聞有虎林下幸逢僧自悔幽尋遠雲峯不敢登

蟬

須知緘口戒將奈不平何此地薰風苦故園清露多予  
懷信高潔衰病況婆娑聞說螳螂巧空山漫浩歌

憶吳氏女

斜陽上高樹暮色生荒村深憶危城苦因悲弱女存嗟  
予貧病甚累汝族丁繁何日重相見銜哀無與言

張魯生小照

斯桂

郭欽不可見魏絳乃多辭薦食憂鱗介求才憶虎貔大  
風通帝夢未雨逮天時磊落如公等終當侍赤墀

過蔣子寅墓

不爲黃墟醉高門亦愴神誄詞無主婦私謚有同人一  
卷游鳧稿三年履虎身橋公原約在敬薦楚江蘋

宿僧寺

行盡蒼山曲肩輿久欲休漫流灘勢闊深竹寺門幽飯  
罷僧舂米房稀客上樓所愁方寇盜珍重問前郵  
翦盡山牕燭羈人尙誦書荒江烟外迴寒柝雨中疎病  
體難求藥朋箋勸棄縠未知經世者戡亂近何如

孝陵

昔挺淶和劍能除草昧屯徐常供驅策劉宋侍綸言起  
輦湮皇蹟開平削大藩史誇追達臘禮失奉諸園猜忍  
誅元佐將牢誤後昆阻兵吳溥壯謀國偃王昏鐵鎮虛  
天塹金川啟禁門謁陵嗟孽子主鬯痛文孫香冷江東  
寢鑿回冀北轅翦茅窺祕閣攘柘盡司閹辰極遼陽  
建謳歌秣數尊南風清海嶠西駕靖崑崙貞愍長平  
節哀招烈帝魂公侯珪永錫杞宋典方存鍾阜繚垣護  
軍都綴祀繁奎章頌鳳闕貢耐薦犧罇蘇碧豐碑藟  
山青石獸蹲居庸峯未覩寶誌事堪論麀鹿重巖伏瑤  
璣五色翻觚棧輝日彩殿瓦拂雲根赭堊年年潔旃檀

旦旦溫守祧藏隋服備恪及曾元遠鑿前規小爰知  
聖世恩鬼神森近籓樵牧肅遙村魁杓旋高緯祠官復  
駿奔鼎湖瞻拜處義感嶺頭猿

某軍門宅鰲山烟火

代

勳伐開麟閣邊塵靖豹韜良才襄聖治公燕逮兵曹投  
轄嘉賓聚傳杯霸業豪六么嬌芍藥三雅泛蒲桃鄉樂  
徵絲竹加羞薦餌饒健兒驚舞劔妙伎笑吞刀傾耳停  
銀甲纏頭賜錦袍脂車方濟濟留客更陶陶上席晶屏  
啟中庭火樹牢烟霞三島合星斗九霄高鐵翅雲摩鵠  
銀山海駕鼇樓臺幻蛟蜃雷電震波濤虬蟄潛噓氣鯨  
呿暖吐膏斜飛同射戟下注象垂橐絢采紆金紫凌虛

建節旄光輝區外仰春色上天操風已暄閭闔明宜燭  
井皋閭閻思樂利軍旅賴賢勞南國休歸馬西戎未貢  
葵祝公如吉甫早晚 聖書褒

金龍四大王廟

廟貌河壖壯祠官祀典專上公崇袞冕中使肅牲牲碧  
瓦凌寒迴元珪佐命虔馮夷瞻玉策童律侍珊鞭部曲  
龜鼉靜提封鄭宋全朝宗歸渤海保障極吳天涇渭秦  
關遠昆侖漢塞連濁泥囿九曲高浪下三川代越畺分  
戒江淮漕轉便風雷驅往復琛賫護回漩竹箭波同順  
金堤礪比堅甬東騰虎步文靖溯蟬聯晉宋留名閥勳  
階軼史編后家卑馬鄧妣氏遜齊燕儀著雲臺仗豪徽

沁水田滄桑悲劫火箕尾叶星躔氣量滋元鬱精神異  
世傳奇誇干寶記誌陋蔣侯賢允翕紆籌略安瀾答吉  
蠲秋頒宗伯禮歲省水衡錢悽婉初明表羈留杜老船  
衣冠遊裸國鍼石飲狂泉龍節森烟樹鵠啼憶井廬臨  
流媿雄駿不敢問筵筭

奉題陶文毅公對小象二十八韻

古有明良遇天教景運開恩綸分陝寄宗袞濟川才健  
筆滄溟起輜軒蜀道來王程行棧閣殊俗問離隄能事  
山頻說清心錦細裁占星天厔重乘傳海陵催冰雪融  
千里風霆動八魁豸冠承帝眷虎節阜民財宣德巴人  
國開藩皖伯臺鉤觚分漢志掇拾徧秦灰昭代吳淞浚

中丞馬慕推決江成海會疏浦澹天災淮運增河患東  
南轉漕哀萬艘趨渤碣一葉小登萊美利貽今日同心  
賴上臺亭池財絀久徐豫地分纔票引蘇商困根窩創  
禍胎開中除律令人粟積京垓飢毀吳民慮常平漢法  
該至今逢儉歲依舊醉新醅述職陳江海高班列棘槐  
家山峰正大奎藻漢昭回象緯珍餘晷楣未備眾材三  
條考桑鄺六義訪鄒枚飲谷留宗炳登臺媿郭隗展圖  
瞻鶯鶯奉對憶邛峽自後憂鱗介相將望雨雷如公猶  
使節所惜未鹽梅公創惜陰書舍題爲嶧山之陽至於  
衡山愚以陽字遂包小金沙江於內  
爲然

奉題續谿唐全山家始祖越國公廟二十韻

今日凌烟閣何人廟貌留滄桑遷亳社襄鄂冷珠邱嶺  
道屣屣秀靈祠閤必幽弓刀遺上將珽黻冠諸侯淮北  
河開後江東草昧秋潛龍猶晉水逐鹿徧齊州一旅雄  
圖奮連城寶籍收韋彭紆霸業婺睦入懷柔星緯三秦  
麗欖槍九有稠天心增漢幟臣節解吳鉤巖邑還千里  
餘糧亦萬艘趙佗羞王越肅慎遂朝周翊衛森元象分  
番贊大猷袞衣光藻火畫戟領貔貅丹旛鄉關返黃腸  
禮數優小民思葛亮高觀表錢鏐雨黑雲旗動霞明桂  
棟浮雪縈勤禱祀父老切歌謳自笑吹竽濫頻煩買藥  
憂登原雖咫尺南望愴松楸



言  
五  
悔翁詩鈔九終

受業外孫吳崧慶隨校

悔翁詩鈔十

江甯汪士鐸

甥上元吳達重校刊

懷江緝安同年

昔年獻賦大明宮江左才名二寶同  
貫酒旗亭爭畫壁  
回車書劍逐飛蓬臥餘司馬供多病  
愁絕虞卿不諱窮  
我更勞薪倦奔走傲裘留滯運河東

聞湯雨生都督七旬外生子詩以賀之

喜聞白髮誕旗鈴瓊樹新枝茁謝庭書誤弄璋  
喧客邸  
法傳餐玉記仙經筵開湯餅知英物家有封胡  
定甯馨  
自笑商瞿今五十紬書獨對一燈青

丙午九月倣西昆體記事

豈有蘅蕪夢裏春無端古井浪粼粼湘蓑前後香歸水  
玉虎牽回鞵帶塵得意山雞曾妬影惱人仙繭誤纏身  
誰憐寂寞荒臺賦竟遣冤禽作比鄰

題湯雨生琴隱話別圖

支離松竹映朱殷上將旌旗駐此閒異日鱸鯢應築觀  
早年猿鶴勸還山論交冠蓋琴書契投老江湖鬢髮斑  
茅屋一樽勤話別雲臺不及釣臺閒

戲題門神

冠佩雍容面目真莫因執鉞謂刑神欲尋相國門前士  
暫寄高賢廡下身平日重閭嚴虎豹異時傑閣畫麒麟  
春來一拂思歸去卻爲丹青想替人

追憶已酉

彷彿回廊小坐深一庭空翠溼羅襟屏圍矮閣燈前酒  
簾卷虛堂月下琴十載萍蹤完趙璧數行蘭訊比秦金  
客中夜雨郎當甚無限波瀾古井心

感興

鏡裏桃花帶霧看仙盟才結忽先寒境疑蜀棧連秦棧  
人奈湯官與服官况值招魂孤鶴倦欲回遭命萬牛難  
劇憐梅子黃時雨揀盡寒枝恨萬端五六句余書以爲聯

維舟觀音門夜望

落木蕭疎冷翠深一樽相對但聞吟江聲撼閣疑風雨  
月色照人成古今屏上吳山雲外寺燈前楚客酒邊琴

柴門南望鄉思切况復前村急暮砧

南沙河有感

春明幾度駐征軺水淺沙平接石橋楊柳驛亭風裡笛  
杏花庭院日中簫求官夢醒雲同冷題壁年深墨欲消  
把鏡自慙雙鬢雪長途不放馬蹄驕

用前韻呈清石師

一代龍門喜蚤登公堂無事冷於冰琴餘坐月招飛鶴  
雪霽尋梅對梵僧異地賓朋三雅酒後堂詩賦九枝燈  
困鱗久臥滄江晚尙祝春雷送踏騰

柱平

驟車歷鹿碾沙平小憩征塵雨乍晴滿院弦歌喧晚驛

一隄楊柳抱春城河干地控礪礪成隴上人耕鼓角聲  
亦有賓王在徒步常何不見涕縱橫

無題

靜鎖朱門綠樹陰隔簾不許一塵侵屏圍山翠餘紅葉  
風送蘭香雜素琴秦苑孤鸞雲易散吳江雙鯉信俱沈  
自憐錦瑟年華老繞徧回廊祇暗吟

已酉

荼蘼香裏院門扃燕子初驚曉夢醒綺閣春開吳苑翠  
畫屏晝掩楚山青雪貌巧撲花閒蝶嬰武閒梳架上翎  
捲起重簾無一事手薰薇露寫心經

改本  
戊申

雜鈔諸作宜分今昔觀之

華堂十丈繡璫瑜左右商彝與魯壺畫裏樓臺人是玉

花前賓客履皆珠燈紅照室迷胡蝶眉翠當筵唱鷓鴣  
直待酒醒人散後蘅蕪不采采蘼蕪記事

卜罷刀環病擁鬢身無雙翼限重關牽蘿婢返珠難賣  
服藥時多帶易寬臺下雨香雲冉冉帷中燈彩步珊珊  
銀河隔斷巫陽恨紅蠟臨風淚不乾悼亡

營前馬夜崩騰上將宵然武帳燈桂管紅旗擒鬼卒

松山與帽走番僧亞夫勝算江西防堵由堅壁張奐威名在

飲冰辛苦

至尊兩願意麒麟高閣待人登欣閱即抄

嶺巉盤紆踞上游潢池無故弄戈矛盧循已中南津箭

劉毅宜迴峽口丹漢將功銘銅柱壯越人業託雒田浮

炎荒今日需廉吏寄語貪泉莫更流同上

十上秦書筆彩騰知君不負短檠燈環肥燕瘦同搖佩

何肉周妻那是僧官舍琴樽人中酒春風桃李鑑懸冰

文通才盡甘焚硯韻集終須讓李登贈劉香南

何事驂鸞忽上騰閉門雁足黯長燈采蘭水暖難湔病

賣藥錢餘爲飯僧社日鶯花春是夢良宵衾篔夜如冰

漢宮不見蘅蕪草阿閣三重總嬾登悼亡

雪晴地氣喜初騰誰奉金錢供買燈煮茗誤驚松外鶴

攜琴聞訪竹間僧河干垂柳才拖綫湖上游魚已陟冰

偶向彭城楷左氏欲援勝母惡華登春初

輓林文忠

海上歸來宦橐空負戈萬里復從戎玉關田賦三司外  
金齒功名百戰中畢竟蒼生思謝傅果然天子用溫公  
大星一墜英雄恨五管烽烟照嶺紅

詠史

錦帆銜尾過鄱湖即日筵前唱鷓鴣見說廉頗還戀趙  
可憐孫武竟歸吳徒薪爛額功先後蕙苾明珠事有無  
往日虞翻嫌不媚一般蕭瑟負髯奴

和劉香南酬史慕韓詩

飛書羽檄正紛騰票炬宵然武帳燈南國方馳致師使  
西堂偶遇打包僧已從結夏長揮塵何事防秋更打冰  
五字堅城自劉氏將壇雖掃有誰登

已解重圍出白登兢兢虎尾與春冰運籌自熟帷中算  
偏袒休猜方外僧祇自操戈起同室伊誰草檄更挑燈  
劉郎已作降王長士馬何妨正飽騰

庚戌九月十月道中雜詩寄李楚珍蔣文若兩同

年

榛莽蒙戎護菟裘幸存貞石記春秋異時有穴容狐兔  
他族於風究馬牛秦趙祖雖同柏翳六舒國莫祀皋繇  
登高一灑雍門泣敢計公羊九世仇

修墓

松柏翳陰隔墓門全家骨肉一坏存定憐奔走緣貧賤  
漫問烝嘗到子孫收拾殘棋猶有劫驚呼噩夢欲招魂  
勞薪莫盡颺蓬恨誓墓風高不敢論

拜墓有感

許陪羣彥坐文壇更賜王喬藥一丸鹽鐵肯容文學論  
琴書累借小儒看喜傳肘後懸金印驚聽雲中降玉棺  
斗酒隻雞無處奠雨花落木暮雲寒過揚州哭童  
石塘都轉  
信父吳兒共一艤曉晴襍被出篷牕東瞻滄海魚千里  
北控中原鳥六雙同是虛名如北斗忽傳稱貸必西江  
臣饑欲死侏儒飽編貝懸河卻未降清江  
有感  
偶偕僉客渡淮來津吏聲喧越閘開野戍驚寒催鼓角  
長河向晚作風雷朱門久輟申公禮白髮虛思郭隗臺  
多謝憐才嚴僕射節樓深夜爲傳杯清江  
至堂河  
楚歌聲裏氣蒼涼謁過關官上呂梁掛劍非無吳季子  
愛詩卻少楚元王濁河帶束嚴城紫芒碭雲連大澤黃

回首故鄉同泣下北風吹雪滿征裳徐州

莽莽平沙護故城荒榛茅屋正春耕長隄南障江淮遠  
廢堞東傾汴泗橫亂世賢人真跡晦乘時孺子大功成  
卻嫌黃綺猶多事偏遣朝廷識姓名過舊邳州  
懷黃石公  
水兵三五倚長篙猶說巡洋觀戰袍萬里牂牁歸路遠  
五年淮海治功高官階不肯徇當軸宰輔何嘗果贈刀  
老任安正蕭瑟題襟苦憶荷嘉褒過揚州懷但  
雲湖都轉  
弱女呼耶掩涕紅何堪阮籍正途窮巢枝越鳥嚴冬候  
繞樹飛鳥朗月中淮海十年雙鬢老江河兩戒一舟通  
師恩友誼俱無補寂寂眞教誤乃公赴徐  
州  
傳言明發下揚州扶病三更補敝裘垂老悔移磐石誓

頻年每作御溝流生無簪珥傳遺愛死念藁砧尙遠遊

孔雀南飛兔西顧爲君俯仰總離憂

哭亡婦

醫工藥物日紛然婦病呻吟夜不眠戀繭僵蠶難吐緒

驚弓倦鳥更聞弦一錢莫措長沙庫百畝誰謀好時田

獨理殘編向燈立差強人意有青氈

九月索居有感

重鎮東南控海隅盈盈羣彥府中趨水衡算析田兼賦

城旦書分墨與朱出納觚籌秦計相公私筆札魏元瑜

衰翁也入翹材館布鞵青鞋只濫竽

呈徐州幕府同事

奇博文章絕世才清時不遇更堪哀王侯難識高賢迹

妻子同驚鬼伯催當戶生男期貴妾蘇韶歸夢仗中臺

回忌燕市悲歌客誰向橋公墓下來

哭張石舟

五年負米涉滎波返櫬翻勞母氏過八月三臺迎素旒

一棺千里隔黃河伶仃弟妹南中苦飄泊琴書鄴下多

愛女昨傳君孝行寒燈冷雨爲滂沱

哭長婿卒於彰德

百里長才八尺軀纔趨省闈卽分符專城早被三司重

廉吏親聞萬井呼絮酒於今悲下馬楹書早日佚遊鳧

激南漳北經行處往日棠陰尙有無

哭陳純齋

扶風豪士賦南旋傳說貲卽得美遷縱飲咸陽曾十日

呻吟裘氏只三年旁妻半娶縫裳伎上客皆收博進錢

雞鹿塞南風雪甚爲君北望一潸然

扶風

寒儒心迹玉壺冰老去渾如退院僧異姓本同寅與射

立孫亦等莒於郇

注不望獺之祭魚亦不爲羊之乳鹿也

爲巢方幸鷓鴣

易類我難期負版能閒理琴書還太息只憑婦女作傳

燈答家天錫大弟

北構陳豨事縱虛藏弓烹狗渺愁予羞隨絳灌同齊伍

宜與英彭共翦除下澤春晴多鹿豕清淮秋冷足蝦魚

真人猶動鄉關戀悔不先借漂母居過淮陰釣臺

誰曾海上訪安期忽認庭蘭作導師漢使法冠峩獬豸

秦臺明鏡燭蛟螭獄成為文孔修師也羣校悲于吉書奏諸公

惡左慈獨惜留侯思辟穀秋風請室瘦難支

羊裘已敝敢云豪尙費閨人補綴勞愛士祇今誰適館

論才於古戒吹毛上書函谷金將盡垂釣桐江節始高

昨向邗溝得雙鯉歲終有客贈綈袍做裘有感文若同年

盜無斗米柳無衣交謫聲高賦式微幾日嘉賓方入幕

九原温序痛思歸參苓北地多何補文酒南皮事究非

揚子橋邊頻問訊淒然同病各依依哭朱梧生卒於直隸

作字無心久倦飛蕭然隻影舊儔稀已隨別鶴翻琴調

欲逐沙驅上釣磯日暮亦知雲水遠天寒敢戀稻梁肥

河干繒繳何須設與爾春來共早歸黃河灘上見瓜雁有感

剡藤三尺散輕烟竹樹蒼茫一塔懸初地鼓鐘開渭汭

上方樓閣壓秦川經幢撞浪黃河箭寶坐噴雲太華蓮

我望潼關欲西笑臥遊不為戒公禪和人華州壽佛寺圖

十年鍛翮不飛騰同翦彭城雪夜燈氣盛尙如持法吏

心灰俱是罷參僧雷陳契後膠投漆廉藺交初炭與冰



異日嵇康倘疎嬾定來山下訪孫登

贈劉書田廣文

### 行隴上憶魏默深刺史

四山過雨翠參天閒話班荆廢隴前  
新鬼啾啾無輔嗣故人卓卓憶橋元  
賚桓頌紀三宗盛山海經教萬國傳  
遙識九原遺恨在不而罕史元未親編

### 望齊雲山未至

迢遙樵徑上孤岑仰眺山門欲墜簪  
絕頂樓臺疑蜃氣就中鐘磬雜龍吟  
老僧采藥青松合游子題名碧蘚侵  
此是祁昌最高處卻因風雨阻登臨

### 懷吳中友人

滿地干戈想未歸瑯琊春柳已成圍  
來鴻去雁三年隔

高岸深陵百事非驛路夢迷吳苑樹  
鄉書淚灑漢臣衣漫誇壺子談微中  
相見當時杜德機

### 王蔭庭席上

哀歌斫地語蒼涼能爲羈人礪劍鋌  
老子韓非竟同傳廉頗李牧未嘗忘  
閭閻同患楚氛惡父老猶思漢臘長  
此夕不辭村酒醺去家四十卽他鄉

### 歧途

歧途相見各酸辛骨肉流亡道上塵  
除卻信陵難救趙勝空煩賈誼論  
過秦鳴桴傳柝此間俗流水桃花何處  
津屈指與君輸故友要離冢畔幾多人

五更亡命走荒坡窮士蘆中側  
弁俄毀服相看吳髮短

摸金終是楚咻多他鄉異縣同桃梗愛女嬌兒痛薤歌  
縱有賓王在徒步將軍無處覓常何

徒陶菴

一陂春水綠平隄避地陶家後渚西風破紙窗春舉燭  
烟昏土銕午蒸藜輻軻吾道真芻狗俯仰前修媿木雞  
萬事蕭然聊復爾無如尚有敬通妻

黃樓

岑樓百尺俯晴空繫馬長隄接若虹已兆河行隋帝瀆  
可真材取憤王宮聲喧尊俎春颿白影射罟罟曉日紅  
樓在城東八百年來尋舊跡客懷都付苦吟中

放鶴亭

雲龍山氣接城闔山上閒亭碧草春想見好文賢太守  
來看放鶴老仙人成虧漫到籠中物得喪全消世外塵  
飽飯安眠無一事不知閭左走朱輪

燕子樓

舞裙歌扇鎖凝塵明鏡難描夢裏顰自有容顏報知己  
肯將歌舞悅新人黃金不惜生前價碧玉俱完死後身  
滿眼白楊總蕭瑟尙書墓草定生春

呂梁山

童山迤邐逼河津巨石嵯峨泗水濱誰鑿龍門通險阻  
欲尋雕羽見精神川原搖落悲詞客波浪翻騰想丈人  
今日二洪成坦道破帆東下接江春

戲馬臺

居巢骸骨草蒙茸何處驂騮可再逢  
五載中原人逐鹿一朝灞上氣成龍  
馬親屬籍編劉氏上將功名付漢封  
老驥不留留驚下烏雕徒躍鼓寥寥

桓山

確炭縱橫草正肥當年司馬想魂歸  
斷刑猶覺桐棺厚弔古翻嫌石槨微  
一代世家誰血食千秋介弟託儒衣  
墓前欲取雷琴鼓華表欹烟鶴不飛

子房山

三傑宗功漢將壇雞鳴曲罷曙光寒  
歌聲四面皆成楚仇氣千秋爲報韓  
進履人嫌黃石少從遊我道赤松難

驅車欲覓前賢跡亂石高低細草殘

利國監

紫翠山光遠近鋪西風驛道過微湖  
舟車何日停騶卒鹽鐵終年議大夫  
幸罷鑪錘紆國課有誰團練作公徒  
愚民自古徐方悍終恐煩君問僕區

微子墓

一杯荒草碧初抽嗚咽遙聽泗水流  
太史惟知爭嫡庶宗祊從此易商周  
桃林曉射周京日麥秀寒分薄社秋  
湯墓卻愁無覓處可憐白鷺共沈浮

彭祖樓

一片榛蕪閣久傾共傳道氣繼容成  
漫談綵女長生術

誰比尼山好古情  
命與殤齊偏懼井  
國緣世及那斟羹  
時賢不悟虞初志  
畫角哀笳訪故城

龔勝宅

高人田宅剩蒼苔  
雲氣荒寒暗不開  
故國久安龍德隱  
清時猶恐鶴書來  
餘生尙爲浮名累  
一死翻增老友哀  
滿目亂鴉知擇木  
有誰弔古翦蒿萊

亞夫冢

遺冢巍然汲水前  
行人自說亞夫賢  
沈機既未知英主  
奇計何難蘊暮年  
六國衣冠雖奉朔  
三秦圭璧詎朝天  
韓彭豨縮紛林立  
玉玦尊前亦枉然

不寐

天賦窮愁劍漫彈  
不分蕭艾與芳蘭  
閉門始信讀書樂  
閱世深知行路難  
收拾殘碁隨去住  
吖咀上藥雜辛酸  
生平尤悔知無及  
欹枕無眠耐曉寒

惜陰書舍謁陶桓公像

宗臣遺像肅冠纓  
傑閣凌空俯石城  
沔上立祠思葛亮  
江干祖述有泉明  
弦歌新啟經生業  
戈戟猶思義旅營  
嗚咽博山山水下  
水當年曾聽鼓鼙聲

縫裘

敝裘季子漫沈吟  
卅載相依歲月深  
補闕聊存司直意  
改爲終抱禮賢心  
負薪樵徑人將老  
垂釣桐江雪不侵  
卻笑胭脂坡上客  
紫裘金爵酒頻斟

曝日

梯袍誰與寄殷勤負曝茅檐至夕曛  
岵岵年高原愛日江湖歲晚不忘君  
鞠躬漫對林閒雪翹首偏憎嶺外雲  
獨念海濱諸父老幾家黃襖歎離羣

悔翁詩鈔十終

受業外孫吳鍾慶隨校

悔翁詩鈔十一

江甯汪士鐸

甥上元吳達聖校刊

辛亥八月移寓唐氏小圃見堂前疎柳三株黯然

有感用漁洋韻

搖落深悲楚客魂書堂塵冷薜蘿門  
瘦成人字移衣帶望斷侯封剩淚痕  
對鏡自憐餘黛影飛花曾喜託江村  
曉風漫憶雙鬟唱張緒颺零不可論  
五上春官驚寒嬰武報秋霜濯濯依然伴小塘  
時隨同事方小待月樓高涼舞袖緝書人老蠹巾箱  
子余無穿楊往日無餘子飛絮前因織法王  
無限低徊欲髡首漫疑腸斷碧雞坊

蕭條無復染春衣時絕意自恨依依往事非  
返水波微

歸櫂早將以月底灞橋秋冷故人稀至袁浦同事空憐

老馬攀枝繫誰伴寒蟬翳葉飛時以教讀羞向西風舞

長袖腰支雖好與時違甚相洽也

顧影迎風祇自憐家山鍛竈已無烟鄉心縱醉前村笛

故態猶思遠道綿以貧故恐明年猶不家食種樹歲華嗟老境渡江

消息盼來年來年欲牛衣有客臺城路獨賣黃瓜古驛

邊謂顯子巽揚雅命

送清石師歸用秋柳韻錄一

長亭黯淡愴離魂猶憶春風立雪門早日綠陰曾遠覆

幾人青眼尚留痕展禽嬾食魯中邑陶令秋歸江上村

獻歲高枝定三起銘功魴鱖異時論時師方引疾歸

有感復詠秋柳四首錄二

深悔東風學舞衣江城漂泊事全非陽關別曲情如昨

太液恩波夢已稀時不應不與春旗同一色余以不飲

片烟故相逢秋燕讓先飛以不諧物故事嚴霜若欲凋

絲鬢豈但生穉舊願違

鏡中禿鬢問誰憐市里閒居憶禁烟客子未歸眉斂却

姬人將遣淚連綿偶因殘月訝衰影縱有東風非少年

剩得永豐坊下恨愴然相送柩車邊

元夕公讌後感懷

良辰何必憶家園清酒三巡禮數存聞說中台登力牧

定傳大將奪昆崙春燈萬點山城晚瑞雪連畦小市昏  
同泣去年弓劍墮橋頭雙鶴尙能言

板橋

青淮交匯板橋頭風景高粱局未收天半樓臺開夕市  
夜深簫鼓過中流繁華返復兩黃鵠人事漂零一白鷗  
莫怪杜陵遙痛哭千門蕭瑟曲江秋

西控梁山據上流東吳門戶奠金甌丹陽步道煩南顧  
胡墅江防戒北遊自昔士行傳運甓未應庾亮但登樓  
龍盤虎踞何由守深賴艤艫十萬艘

幕燕何知鐵鎖沈上游狂寇劇相侵項梁本有輕秦色  
宋義原無救趙心春曉長矛踞府寺夜深羸服遁山林

舊遭白髮嬾懷刺况覓朱門自鼓琴

懷古

兩陣殷勤勞苦時執冰士氣念鄉誼玩之股掌中軍帥  
病入膏肓外宅兒五管三湘原接軫

兵與賊多楚粵人故每交接而退

楚歌黎唱若爲思揭竿亡命須臾事只望臨淮命世姿  
內庫瓊林啟最先大農籌餉費迤邐寶泉已絀三司議  
井稅依然數載蠲鹽筴書傳迷楚岸車縉算罷少吳船  
潢池赤子知恩否大帥殷勤試再宣

良吏難逢勝執戈人材求備欲如何武侯將略成功少  
黃霸勳名在郡多太守何嘗能射虎御人未必敢爲鶩  
時賢相士先趨走謾語才能盾鼻磨

儼諸將五首

作賊何人得白頭無如三戶苦勾留丸探赤白皆烏合  
劔相雌雄只馬流司隸衣冠還楚楚國殤父老又赳赳  
衛青不及票姚勇虛擁金貂說運籌

獨任居然繼朔方屢傳吳楚失巖疆威名往日齊諸葛  
仁義於今學偃王退舍坐看臨晉渡吉行一任大梁亡  
成邱白骨天陰哭似怨東川用子璋

專征禮數最優崇五載能無尺寸功秣鞫高冠春設燕  
芙蓉洋藥夜吹笛三軍可奪無朱亥兩利俱存見蒯通  
借問故人操白簡可曾回首憶江東

四府無人任賊行數千餘里悞春耕西江州郡尊前列

東浙山川席下橫侍御匡時召納粟朝廷失計諱增兵  
流民更有憂葵意早晚全師潰鄴城

日費司農十萬金擲同虛牝尙非深雲帆漕轉師前軌  
淮海膏腴聽陸沈龍虎尊嚴猶抱郭豺狼嗥嘯尙如林  
側聞庾亮工遵養辜負窮簷望捷音

有感

景教流行信禍胎開山况借楚人材何辜鶉首眞分土  
不畏軒轅敢射臺蚌鶴恐貽番舶利蟲沙專待漢軍來  
江頭野老蒼茫泣諸將吟成亦可哀

一衣城邊橘樹刪賊濠鹿角互回環虎眞傅翼荆蠻眾  
馬敢論芻蕘將頑杖鉞惟知思趙卒

時帥非北  
兵至不戰

丸泥不



解閉秦關

長江一帶全無守禦

棘門壩上前朝事鼓角連年臥蔣

山

時帥營蔣山

妖民張角裹黃巾蟻聚蜂屯脅市人諸部酋官同拓跋

賊首皆曰大人

一時鴻號竊姚秦

賊自稱曰天王

未聞密時曾稱父

賊稱

天曰

始信臺駘本不神

賊毀折祠廟至盡

向寵性行均淑甚終

朝閉壁對城闔

搖落高梧鴻雁秋曉涼晞髮坐危樓祇知威楚思城濮

何日平吳賴益州天到龔生真足弔福如嗣祖恐難修

勸君且莫悲蓬梗多恐言愁我更愁

獨立

雨晴春草欲侵階獨立蒼茫倚綠槐山接東廬盤極浦

城懸北斗抱清淮側身天地一悲嘯垂意古今生遠懷

江左夷吾何處覓哀鴻滿眼費安排

張仁齋疊前贈香翁韻見投作此志謝兼呈徐柳

樵時讀山海經

蹄涔日祝絳虬騰

用郭氏山海經序

江浙名元有慧燈縱酒放

歌君盡俠袒衣乞食我如僧抗懷師說慙韓愈致禮時

賢有庾冰願解綠鞵放鵬鶚青雲有路祝同登

錢忠懿王金塗塔墨

妙墨摹成窳堵工仁賢遙想浙西東早聞幢葆迎慈氏

晚獻河山繼寶融笑看兒孫文物裏全消劫火甲兵中

降王運命能如此生世何妨帝子宮

廣州光孝寺千佛鐵塔記

四恩八表屬詞莊蓮座森嚴壓上方見說列名書宦者  
只宜執挺長降王榕陰晝覆僧廊暗海氣晨蒸石蘚荒  
却賴小長蘆釣叟爲君雙塔記安詳

績谿北鄉石鶴山劉宋安成太守陳猛墓

陳武帝之會祖也

林莽蒼茫石鶴幽土花遙憶六朝秋貽謀幸值梁承聖  
世系追書漢太邱想像生金尋墓碣幾曾刻玉護松楸  
萬安陵寢經行處一例荒涼牧豎遊

績溪太子廟後漢之楚王英也

丁巳

似傳絳節過崆峒玉兒迥然德氣充仙仗幾時參鶴籞

禁方無驗笑龍宮前朝鴻寶陳編碧故事房陵怨血紅  
若使正名逢魯史不教留恨問阿東

丁巳年在績溪作

積雨深巖老樹昏共攜笠屐到山樊炊烟繞竹方迷路  
江月隨潮不到門九日風霜肥蟹菊百年文物共琴尊  
時艱漫逞書生議任事人稀未易論

和杜秋興

高岡北望鬱崔嵬飛蓋橫笳卷地來漢帝至今思鉅鹿  
師臣何日畫雲臺外廷揖盜巖城失中夜招魂野哭哀  
定有奇人在耕釣巖徐終馬恐非才

僕射官傳往代型橫宮偏重子衿青承明待詔還辭賦

言十一  
六  
河北便宜豈孝經漢使但工巴蜀檄吳刀不見羽山腥  
儒生終日卑微管江上哀號未暇聽

夜半聞雞幸此曹深山嘯侶演弓刀翹材不啟宗臣貴  
廣武誰延幕府高置吏連章師子靜法官三殺笑皋陶  
坐談劉表終風雅尙解呼鷹首重搔

三吳才彥出金閨鐘鼎功名未敢齊唐室勁兵句注北  
漢家名將隴山西明駝空想飛書速熊耳終嫌解甲低  
何事冠軍尙高會大旗斜卷馬驕嘶

算緡裁賈竭紆籌誰爲司農借箸謀杼柚東人雖告病  
蝻蝗中夏更堪憂祠官牲璧嗟雲漢少府鹽銅失斗牛  
太息事機多坐誤伏波隨處總淹留

黃陵一役自云佳五百餘年禹跡乖喜說北流趨渤碣  
曾憂南戒合江淮河隄漫惜金錢利東郡行愁芟玉埋  
滄海靈帆憑轉漕聖朝從不吝官階

軍輸久困鄴侯賢佐國原知鼓鑄先蜀道縱虛三品貢  
永安漫改五銖錢見愁小市無鹽米合與豪家買管絃  
民俗更憂交子務鍾官珍重爲流傳

舊傳典屬用蘇卿胡事恩威撫八盟甥舅縱親回紇國  
豺狼恐啟契丹兵武功試補元戎爵文吏姑停喜起聲  
好荒朔方忠勇將高秋切莫會龍城

和杜懷古

漆書一卷與身存轉徙西州去里門孟冀周旋狂寇過

衛宏授受古文尊還歸碩果思三輔流亂棠華痛九原

莫灑吞令數行淚鹿車猶得自招魂

杜林

同是彬彬羨仲文不逢武達訴離羣坎軻悍婦殊猶臭  
寂寞名賢慕蕙芬狼孟署官無故友鴻門退處少新墳

孝標莫便嗟秋草姜豹摧殘孰忍聞

劉峻

二男一女委荒塋天道人倫慘不勝垂死秦川悲寶盃

相逢楚老感金陵賢王滕趙雖相愛佳夢熊羆已莫徵

應對關河怨朱异小園暮雨掩寒燈

庾信

鄜州才住又秦州夔府成都汗漫遊垂老鄉關猶戰伐

依人羈旅慣春秋天寒紫鳳衣顛倒雪夜黃精路阻修

幸有故交嚴僕射能寬禮法共觥籌

杜甫

介然清節殿遺民絕壑冰霜不願春鳳閣親朋召弓乘

驟車書卷歷燕秦死煩猶子蒸嘗奉交徧儒林學術醅

壹惠與君堪共論平生縞帶少時人

顧絳

和杜諸將

獐獐雜種慣戈矛容管深山釀隱憂拔地萬峰圍鬱水

插天一柱限交州文臣久乏韓雍武上將宜深馬援謀

誰肯官衙爲傳舍半由成例半才猷

廣西此輩非大兵痛勦不爲功文

臣既格定例又孱弱自知非其才不得已以爲傳舍所謂求參不得之官也

嶺嶠盤紆向北來重臣經略越王臺雲霞曉抱金銀氣

虎豹宵藏杞梓材舟下滙關遙赴海崖深瀧水急奔雷

任囂城外珊瑚網奔躡非無罟駕才

廣東

宵占二卯玉衡閒阨塞何曾置八關營道知連萌渚嶠

蒼梧方慘九疑山風雲八陣遲連率狔犴諸苗隔百蠻

今日楚氛猶甚惡中原江左遍朱殷

湖南

四年強寇通天誅昨報司徒復鄴都江上鯨鯢方築觀

日邊圭組已分符移舟定自同陶侃閉壁何須學亞夫

江漢上流形勝地幾時戈甲下東吳

湖北此  
諷楚師

激湍如箭嶺如簪環甲儒生此駐驂九水會流彭浦北

七閩保障信州南城從伋去人誰守地號彭亡戰不酣

今日乾坤方用武重臣莫只戒狼貪

江西

深箐灌莽昔年刪一綫通塗萬仞山墨經誓師留右轄

朱幡莅郡改南蠻縣同曲逆知增戶戍撤陰平不置關

只有子重數奔命旌旗蕩領日回還

徽州此  
言張小浦

江淮昨汴貫清暉濤霍司空莽翠微票騎移營迴組練

沙陀鳴鏑下渦肥張遼昔有濡須戰朱瑾何時霸府歸

往日故人皆白骨國殤碧血滿漁磯

安慶此言  
僧即平苗逆

軒轅臺下敢彎弓肩膊何時濺血紅愬武古通皆大帥

貔貅貔虎未成功法嚴九族鴟音革城墮三都雉堞空

寄語南征諸將佐麒麟閣在碧霄中

金陵此言  
向和二帥

揭竿宋亳極縱橫颺忽東西擾列城地控黃河通汝潁

天垂朱鳥妙權衡誤從法吏侈開網變豈潢池偶弄兵

漫說龔黃能德化奇瑜文燦盡專征

歸德此  
言捻匪

百年改土襲衣冠銅鼓銀釵奉漢官槃瓠子孫於犬近

銅鼓軒

言十一  
九  
鬼方風俗變夷難解仇深峒諸苗合傳咒精夫小寨殘  
諸葛攻心真善戰暫憑文告報平安 貴州

憶岳莘潭蘇州

傷亂連年鬢髮斑三旬九食念君艱鄉閭曾共田橫島  
妻子還同士雅山彈鋏無人憐客邸吹簫何日過昭關  
百年縱傍要離冢華表終當化鶴還

有感

刑鼎刑書鑄最工養癰必患百年戎須知封豕長蛇毒  
盡產深山大澤中負杖自傷劉太尉築城反羨晉司空  
平生未悟瞿曇學第一慈悲意不同

有感

銜尾風帆渡夕曛柁樓南切蒜山雲三條漸欲江淮合  
一綫何嘗楚蜀分轉漕頗勞蕭相國屯田幸有趙將軍  
潞河彌望多阡陌誰繼賢王更策勳

悔翁詩鈔十一終

受業外孫吳鍾度隨校

悔翁詩鈔十二

江甯汪士鐸

甥上元吳達重校刊

得華枚宗長卿書卻寄

庚戌

並世誰能識子雲禮賢况憶信陵君著書不意千秋遠  
談道終思十駕勤側目當塗魚點額浩歌吾黨雁離羣  
昨傳萌渚烽烟急可要長卿諭蜀文

清石師遷邳州刺史非所好也先生舊牧高郵有

惠政至今思之

辛亥

當時驅馬白門樓尚厭河聲咽不流况是廉頗思趙卒  
幾時禹錫易連州十年棠蔭秦郵滿八月珠光璧社秋  
借問憐才諸大府可容竹馬迎并州

獨立

壞雲莽莽壓昇州鴻雁哀鳴野戍秋  
獨客呼燈寒照雨殘兵吹角夜登樓  
老懷苦憶琴書燼別淚常憂子女流  
聞說黃巾滿河北蒼茫獨立感山邱

過洞庭望岳陽樓有感

儼乘黃鵠上層阿挾兩飛仙共醉歌  
四塞際天懸日月三閩無地問鼉鼉  
豫章竹木通吳近巴蜀魚鹽下峽多  
欲借樓船此開府九閩高遠歎微波

蔣文若太守迎風巷寓宅牡丹

百朵奇葩直百金周張錦屋護瓊林  
門多車馬聲華甚春滿園亭富貴深  
妃子穠妝綠傅粉醉翁高宴未抽簪

自知老被花神笑桐帽棕鞋亦惠臨

黃鶴樓東眺

絕頂西風滿客襟江山盤鬱此高深  
十年長作新亭泣終日惟思正始音  
幸有延陵曾許劍吳木已無鮑叔與  
分金蔣文若新卒登臨只作歸乎歎  
殘照啼鴉故國心

泉社春游圖學后山體

詞林丈人組已解東郭先生履未穿  
泉社共圖十日飲春城忽有萬家傳  
自來撰杖陪長德端賴從游足後賢  
鴻雪易消畫絹在定教好事憶今年

十年八月

輝輝南斗火星明七萃連宵潰富平  
絕徼河山開御幄



懿親周邵鎮神京深陵高岸人閒世后土皇天海上盟  
聞說論都有婁敬遺民洒涕望西征

重有感

平明稱蹕上之回校獵甘泉詔久裁復有妖氛能入斗  
河無上將肯登臺荒城古驛三家店落木寒蟬竟日哀  
我望紫宮迎法駕時危誰是出羣才

過桃樹嶺

嶺上嚴關戍角哀關前石級凍初開幾家蟻聚窮檐接  
一線螺旋左擔來落日長林噪虎豹寒天絕壑起風雷  
時危壯士誇長劍誰問摩崖作頌才

庚申十月將入關

三帥曾無翼戴謀逡巡王事竟貽羞井幹不厲刑神鉞  
華嶽空垂白帝旒秋老朔方雄鼓角雪消河曲貢琳球  
商君張相庸庸輩尙使秦人冠列侯

瓜沙

瓜沙驛路接乾齊日宿連天水滿隄元使尙能到星宿  
番民豈不望雲霓霜寒萬帳祁連北龍護雙旌弱水西  
除卻曾隨班定遠伊犁江上孰留題

漢家威信服天驕無那元戎鶴髮凋九姓北連昭武近  
四城南控月氏遙見愁貴種推和卓何日賢藩得義潮  
此是先朝耕牧地掄才定有霍嫫姚

宿遷道中

驅車西避霍嫖姚時大軍路繞河隄馬不驕地夾淮沂  
多斥鹵山連鄒魯失岵巽徙薪計拙魚龍沸塞菱金多  
盜賊消借問防秋諸謁者携捕終日聚官寮時中興決  
龍口尚未合

宿石佛寺

奔流出壩萬戈椿碎石驚沙一例降小市瓜蔬寒帶葉  
上方燈火夜銜窗秋深虎跡交林薄風急河聲撼佛幢  
拂拭琴書待明發不容歸夢渡邗江

辛酉登黃鶴樓舊址

獨上危城日幾回江頭野老忽增哀雷驚電掣龍飛去  
葦白菰青雁乍來朵殿五雲移帝座阿房一炬豈天災

漢家自有中興象莫憚黃金早築臺

鐵馬

鐵馬金戈萬帳屯天山南北屬烏孫已無鮑昱籌疏勒  
未見班超入玉門投袂功名蛇足戒合塋節義豹皮存  
空煩 宵旰增西顧準部鴟張未易論

胡文忠公祠王戊

黃鶴樓傾長薛蘿文忠祠廟此巖阿千年仙客羽毛蛻  
一代勳臣戰伐多天遠江山自雄傑時艱平勃重調和  
信陵門下無他士不盡愁心偶浩歌

壬戌紀事

東瞻渤碣瑞雲紅帝眷殷勤邾鄆同析木有津移蜃市

蓬萊無水徙龍宮星躔連璧祥新見樂奏鈞天曲欲終

時宮保師病漸瘳也

傳語昆吾爭伯業好摩石鼓賦車攻

有感 癸亥七月

溺後儒冠已不尊猶將媚骨責虞翻百年風俗伊川祭  
列郡人才廣武原端合青氈歸社學漫隨朱履入侯門  
元和司馬休嗟怨小戶流亡幾室存

蕩節

蕩節遙隨使相騶銀鐙遠逮上書囚彈文竟坐金三品  
左券真憐鐵六州西極冰山歸夢杳南陬銀甲口碑優  
漢廷方重公孫策莫怪人輕萬戶侯

憶吳立生關中

梁園賓客久摧殘典盡貂裘旅舍寒負米遠遊秦內史  
籌兵請募漢材官徙戎江統陳書早糾黨張豺解甲難  
若憶危城防守苦將軍莫怨惠文冠

感友

聞說沙灘近翠微幾人網得魴魚肥江湖凍合龍蛇蟄  
草木陰深鷄雀飛壁上懸弓終有影隧中抱瓮始忘機  
何如竟上通天表定放梁朝沈炯歸

讀陳后山黃樓銘有感

突兀高樓頰太虛彭城萬姓免其魚競鑄樂石銘殊伐  
孰使坡門歎起予周鼓秦碑瞻氣象地輿天蓋轉紆徐  
瓣香一語君謙抑行義文章總弗如

鄭衛音傳七百春後生握槩逐聲塵卷簾一顧驚天帝  
辟舍三逃盡主臣海水橫流愁此日河源重到竟何人  
茅君儲子誇文選未識之而自有真

次韻惠元寺觀流球貢使歸國

高祠喬木靄晴暉畫角催人下翠微絕島冠裳朝正朔  
暮春桃李麗皇畿烟霾古壁龍蛇舞風引長旛鳥隼  
飛須識國家柔遠意滿隄新柳蔭征衣

漫與 癸亥

科頭跣足對滄洲思若長江無盡流古木荒苔生靜趣  
孤檠細雨動鄉愁已泯去住魚千里况是窮通貉一邱  
昨見捷書宣露布似聞李廣未封侯

自題撫鄂記

故鄉烽火未能還排比公文寄燕閒下筆幾人師涑水  
閉門何地不箕山學無學輩睚眦定材不材閒位置艱  
獨有枋頭多物忌局之老屋不教刪

劉孝然自陝歸漢上

征西書記本翩翩卻聘歸耕夢土田千歲茯苓饒晚節  
五更曷旦警春眠昆明舊是埋愁地鶉首難呼已醉天  
我更心傷小兒女全家音問阻秦川

寄懷慶友人

昔年聲價共南金豈以雲泥易夙心前輩本憂聞道晚  
吾徒休悔入山深高天厚地驚滄海清濟箕關近竹林

我倚征東羈幕府桓文勳業願從今

胡文忠公祠

岿巍傑閣俯城闔欲挽長江洗戰塵  
斬棘披荆成大廈吞吳平越失斯人  
雲中黃鵠那可見沙上白鷗誰與親  
我在信陵門下久不緣私誼已霑巾

召鶴軒

胡文忠公祠後茶肆也

砥柱荆揚得上游宗臣遺廟此山頭  
明時公亦如文士沒世人方擬武侯  
下界鯨鯢猶跋浪高城草木已先秋  
眼前風景殊寥廓何日新亭老淚收

贈查翼甫

鄂城落木氣蕭森冰玉追攜豁素襟  
異地河山生遠感

故家文物有遐心白雲無極樓頭鶴  
舊雨常來海上琴

其師張君廉卿

獻歲春風動幽壑清陰應復繼瓊林

嚴中丞

一封帔傳九霄來龍節曾霑御氣回  
似有徒洲誇楚語遂書思對出平臺  
河山指顧懸金印翰墨因緣賞玉杯  
只惜漢升無霸業宋州白骨不勝哀

寄內弟宗馥堂

亂離何地覩葭葦有姊先亡弟妹無  
長物隨身只鉛槧短衣浪跡滿江湖  
君才奚啻百斛鼎吾力原輸一匹雛  
莫爲鹽車思遠馭逢人輕與効馳驅

甲子中春蔣寅昉奉其太夫人南旋詩以誌喜

欲共桐江把釣竿忽傳歸櫂發郎官星明婺彩春暉永  
龍護瑤函海氣寒亂後故人宜賣藥天涯熱客漫彈冠  
高城日望南來雁告我凌虛五鳳丹

甘園牡丹 甲子三月

紅巾烽照楚江濱粉膩香融忽相親  
質庶本無三宿戀灌畦何意十分春  
爲隣國色思金谷愧少清尊駐畫輪  
厲方伯 莫話故鄉雙蠟屐九天鸞鳳尚風塵

見訪 甲子九月將返里門追悼包丈慎伯

憶共傳杯住節樓一時風誼重諸侯  
治河不信惟三策論學誰知備九流  
同病久憐江上女倦遊今羨水邊驅  
歸兮應悵山陽笛况復桓譚亦白頭

甲子九月七日得王子壽詩卻寄

郎官湖畔艤歸舟正擬雙魚寄硤州  
卻枉高歌傳白雪更能記里到黃牛  
十年虎穴磨牙後一代龍門禮士優  
若問故人東去意芒鞋冒雨訪松楸

感悼

破帆乘夜過揚關自媿勞薪未得閒  
授簡浪誇梁苑雪挽車孤負灞陵山  
客中臥病聞牛吼市上吹簫羨鳥還  
今日敝廬重徙倚卅年地下歎愁顏

衰翁不醉亦如泥夢采薜蘿見故妻  
命薄遇人何善惡家貧溝水自東西  
紡磚累結生前恨荆布空留死後啼  
渴葬荒原齋奠闕一坏黃土慘棠梨

甲子十月歸里

上相飛書出梓鄉，凌晨擊楫下潯陽。一千年外初歸鶴，三百羣中最後羊。幸有朱門容鼓瑟，可堪白髮更臨觴。尊前無限河山感，不忍荒田話老桑。

寄程汝鈞皖城

不爲成虜罷鼓琴，江城東望每沾襟。關河搖落生機薄，桑梓腥羶戰氣深。芳草亦殷三徑望，寒燈久負百年心。自知桃梗終漂泊，聊借飛鴻寄遠音。

歸家

千里歸來戰壘平，郊原白骨尙縱橫。蒼茫落日搔蓬鬢，嗚咽寒潮打石城。道德文章方不朽，山林市井豈同盟。側身天地吾廬在，齧粥何妨了此生。

懷齊撫閻丹初先生

虎嘯龍爭起戰塵，始知管葛有經綸。江河難挽逶迤濁，霜雪終成醞釀春。藥籠濫充千里骨，竹林私祀九分人。陶家松菊同荒廢，望岱陰齊一惋神。

懷汪介堂處士

閉戶湖湘每憶君，又從尺素讀鴻文。春秋宣榭災方見，南北甘陵黨漫分。亂世高人託龜策，空山羈旅總雞羣。莫悲寄食依亭長，多恐終爲出岫雲。

送楊見山

江上論交孫楚樓，忽傳彩筆入荊州。蒼梧朱鳥揚舲賦，

堯典皋謨借箸籌馬骨頻煩千里致蛾眉莫使六宮羞  
杏林春色爲君盼始信金眸脫錦鞵

回里後鄰人九日召飲

喜共妻孥近故園逢君召我上高原百年未死親朋盡  
三徑雖荒松菊存地異山陽偏弄笛人來彭澤與開尊  
坐客李令夢華小錄真淒絕桃梗飄零那足論  
自江西來

朱秋園同年

潦倒琴書髮久斑一登仕版豈能還行年七十誰推轂  
削牘三千尙抱關陽羨田腴思置宅淮南桂發未回山  
勸君拂拭懷中刺子弟屏風隔二班君子姪皆新  
得分發同省

自悼

非文非武復非商游戲朱門託楚狂故友綈袍方卒歲  
盛旭人方伯蔣文若太守嚴元勳書幣約還鄉曾文  
渭春中丞在鄂皆蒙其周給正公妻  
孥何幸歸臣里兒女前時賦國殤一桁敝衣千斛淚旁  
人漫比魯靈光

邢子膺大令

俯仰精臺本強顏持籌何意綴鴛班爲周易學京焦後  
評古文詞籍湜閒八口朝飢惟飲水一行作吏驟還山  
皖雲不遠無鱗羽倦翮經年想已還

或言與吾同名者戲荅之

江東窮獨老迂儒言論拘墟計畫疎劍術旣慚魯句踐  
文章遠慕馬相如東風寒食摹韓句西岳豐碑仿蔡書



若以同名稽列史亦殊忠佞不相於

謝程汝鈞惠茶

倦客支頤病漸差  
開門劇喜餉新茶  
微於蟲臂生天地  
累過猪肝快齒牙  
別者五年三徙宅  
歸兮十度九停車  
歲寒一棹思相見  
想有疎梅冷作花

乙丑六月十六日

去年此日慶更生  
盡築鯨鯢下省城  
伐罪江南曹武惠  
尋師濟北漢文成  
河山縱錫勳臣報  
伏臘終牽父老情  
何況墮中尙鼙鼓  
未知曾否起營平

憶閻丹初先生

公忠深結九重知  
司馬司空印遞辭  
吏道山東傳治譜

清名河北仰人師  
苦期學案綿關洛  
細與生徒定禮儀  
卻憶楚藩風月夕  
篝燈閒話課文時  
公奏復張呂  
關中舊學

憶倪豹岑太守

轅門春靜曳長裾  
能使山公歎起予  
六法冠時閒作畫  
十年通籍尙傭書  
君王子  
庶常易占飛遜深  
相近詩誦躬  
愧不如近說睢漳  
資保障今爲荆  
州太守上游鎖鑰  
賴吾儒君參

嚴渭春中丞  
軍事最久

憶李佛生觀察

蕭然獨抱伯牙琴  
次律而還孰實音  
未必謗書真滿篋  
忽過官計遂抽簪  
動階雖中二千石  
奉賜才贏五百金  
圖史齏鹽同一舫  
定聞鸞鳳嘯空林

憶汪維城刺史

宦海源流本嬾尋惟知飼鶴與調琴政留蒲邑人稱善  
水溢麻湖竈未沈漢法力行真掣肘楚師不競更焦心  
還山麋鹿談何易要借甘棠一片陰君辭官詞云與其  
若為還山之猿鶴蓋方  
以松滋水患卓異也

憶朱石川大令

誰將惹苒作明珠鸞獄連年事有無其頌能官賢令尹  
忽稱識字老農夫清查一洗池魚累 明詔為申市虎  
誣即見垂虹繫歸艇秋江烟雨夢鴛湖君浙人為同官  
所忌有白其誣  
者始  
放還

憶王子壽比部

文章氣節冠當時讜論嶒嶸海內知釋褐勇辭司寇祿  
上書特荷 聖人慈臯魚至性憂風木魯女微詞託露  
葵借問白螺磯下路幾人載酒大宗師君有奈室吟稿  
憂時作也家在  
白螺磯之下時  
方主漳南書院

憶田獻之明府

堂前松竹昔賢留官廨書齋景儘幽出宰幸逢山水縣  
臨財恐作子孫憂嬾催租稅稱田畷屢借衣冠見督郵  
九等難民余自  
號也最顛沛託君仁字得優游

憶唐魯泉明府

從容罵賊山城外一紙家書並就焚幸有韓階營毅魄  
君殉難祁門河中亂定尸多不可辨  
君客錢唐許益齋以君元報禱識之更逢李漢甘君錄  
愚亭錄

遺文催科撫字無全考易義立言識舊聞大鳥臨危輸  
小雀申屠慷慨定呼君

趙伯駒滕王閣卷子

今藏翁  
鍊某處

滕王高閣頰城圍湖漢遊遊尊俎新樓觀已燼數千里  
丹青流照七百春西山南浦自清美晉楷祝枝唐文祝  
王勃尤嶙峋系曰一卷併三絕佳哉孫君其固珍

追哭顧子巽

泰山華嶽竦孤立蚓竅蠅聲不可聞海內風塵資遠識  
胸中芒角發奇文如何如何今至此古人古人乃到君  
老死天涯一洒淚生平同不埒青雲

弔何子貞

儒林道學其純修老厭承明作遠遊舊德三朝成大隱  
高名四海仰清流冠彈柱下繩愆正中漉筵前酒德優  
回憶慈仁古松下昔年酬唱絕朋儔石舟願  
船朴生

送左清石師引退

攀轅無計遣孤寒夜半乘潮過急灘尚有俠腸憐下士  
不妨強項對同官拂衣江海孤蹤遠脫屣簪裾一笑看  
多恐蒲輪隨漢詔赤松未許久盤桓

琴堂歲歲飲廉泉引退翻居卓異先

將舉  
卓異

歸去尙無三

畝宅幾人眞泛五湖船載書聊復充家具賣賦應能給  
酒錢簪笠筇鞋閒訪道忘機久到海鷗邊

非緣松菊久荒涼欲著斑衣奉北堂漫比庚桑居畏壘

那關汲黯薄淮陽鯉庭夜課雙珠秀雀舫春行七澤香  
聞說祝融峯最好不須朱邑戀桐鄉

俯視烟雲萬彙空重才真與古人同體髀屢試屠牛巧  
牝牡尤推相馬工南國風騷傳宋玉西京循吏繼文翁  
白頭弟子知忠悃願向東山起謝公

海翁詩鈔十二終

受業外孫吳鍾慶隨校

305  
20

終